



Nuuk, 27. januar 2014  
Imm.ataatsimiinneq, Imm./Pkt. 9

### **Naalakkersuisunik qinersineq**

Inatsisartuni ullumikkut immikkut ataatsimiisinnerput naalakkersuinikkut qaammatini kingullerni ingerlatsinerliornerup kingunerisaanik pivoq. Inatsisartunut ataatsimiigiaraangatta qilanaarluta pisaraluarpugut ullumikkulli taamaanngilaq. Immikkut ataatsimiinnermut toqqaannartumik pissutaasoq tassaavoq Aalisarnermut Piniarnermut Nunalerinermullu Naalakkersuisup tunuarsimanera, tunuarniuteqarnerminullu patsisigisaa tassaalluni pisassiissutinik naatsorsuinerlussimaneq.

Inuit Ataqtigiiinnit oqaatigissavarput naalakkersuisuni ilaasortamik taarsiineq ingerlatsinerup pitsanngorneranik innuttaasunullu toqqissisimanarnerusumik ingerlatsilernissamik kinguneqassasoq ajoraluartumik qularilluinnaratsigu.

Tassami siorna apriliimi Naalakkersuisunik nutaanik ivertitsisoqarneraniit ullumi naalakkersuisunut ilaasortat 11-ssaarivertinneqassasoq siunnersuutigineqarpoq. Taamaaliornikkut aalisarnermi naalakkersuinikkut ingerlatsineq illorraap tungaanut saakkumaarnerasoq ullumikkut soorunami nalunarluinnarpoq, misilittakkalli naapertorlugit tamanna aamma qularnarluinnarpoq. Taamaattumik massakut oqaatigeriissavara Inuit Ataqtigiiit siunnersuutigineqartumut taaseqataassannginnatta.

Naalakkersuisut siulittaasuat annertuumik akisussaaffeqarpoq. Ingerlatsinermit akisussaaffik qaffasinnerpaaq Naalakkersuisut siulittaasuanniippoq. Naalakkersuisut siulittaasuat pisussaaffeqarpoq partiini kisiat imaluunniit Naalakkersuisut kisiisa pinnagit, kisianni nunatsinni innutaasugut tamatta pilluta. Akisussaaffillu tamanna naapertorlugu aaqqiissuteqartariaqarluni.

Innuttaasut tusaaneqartariaqarput, illuatungiliuttut aamma tusaaneqartariaqarput. Inatsisartunut nutaamik qinerseqqinneq periarfissatuangulersutut isigaarput, tassami ullumimiit Naalakkersuisut allatorluinnaq ingerlatsilerumaarnerat upperiuminaatsilluinnarparput.

Naalakkersuinikkut aqutsinermi naalakkersuilluarneq qitiulluinnarpoq, partitullu ingerlatsinermit immikkorluinnaq ingerlanneqartariaqarluni. Pissuserissaarnermik tunnga-veqarpoq innuttaasullu qinigaasunik asissuilinnginnissaanik imaqarluni, naalak-kersuinikkullu suliaqarnermi malittarisassanut ataqqinninnermik aallaaveqartaria-qarluni innuttaasullu soqutigisaannut eqeersimaarfeqartariaqarluni.

Allatut oqaatigalugu tassa imaappoq: Naalakkersuilluarnerup ilagivai inuttut pisinnaatitaaffinnut ataqqinninneq, tamat oqartussaaqataanerannut ataqqinninneq, assigiinngiaassusermik ataqqinninneq, tatisimaneqarani oqalliseqataasinnaanermik ataqqinninneq, inatsisit tunngavigalugit nunamik ingerlatsinermik ataqqinninneq, pisorta qarfinnik ingerlatsineq tutsuiginartoq, aqutsinermi pinerlunnermik akiuineq ataavartumillu napasinnaasumik aningaasarsiornikkut ineriartortitsineq.

Inuiaqatigiit soqutigisaat partiinit inunnillu ataasiakkaaniit pingaernerutittariaqarput. Isumaqaarpunga massakut erloqinartumik inissisimanitta tamanna qiteringaa.

Naalackersuinikkut pissutsit ajortunik kinguneqaleriartorput. Inuiaqatigiinni akeq-qersimaarneq, akerartuunneq aporaaffissarsiornerlu avissaartuunnermik sorpassuartigullu unittoornermik kinguneqalerpoq. Tamannalu kialuunniit iluaqutiginaqulu nuannaarutigisinnaangilaa.

Nunatsinni pissutsit annertuumik sammisariaqaraluartut allarpassuupput, pingartumillu suliffissaqarnermut aningaasarsiornermullu tunngasutigut aaqqiaagiingissuterpasuit aaqqinneqarnissaannut utaqqerusaarnissaanut piffissaqaratalu akissaqanngilagut. Piffissaq nukiillu ataatsimoortitsiniarnermut naapigiaanermullu atorpeqartariaqarput. Ajugaaniarneq tunulliullugu ataatsimoorluni angusaqarniarneq salliutinneqartariaqarpoq.

Pissutsit allarpasuit politikerinit sammisariaqaraluartut pisorpassuarnut politikimut attuumassuteqanngitsunut ingerlatsinerliornermilli pissuteqartunut tamatta saasarneqartuarpugut, uffa inuiaqatigiinnut iluaqutaasussanik suliaqartussatut qinigaangalualuta. Aamma tusagassiorfiit tamarmik piffissami sivisuallaalersumi allanik sammisaarussimapput, tullianillu arlaannik uissuumminartumik pisoqarnissaanut naalarniinnalersutut pissuseqarpugut. Tamanna soorunami naammaginangilaq.

Meeqqat atugaannut tunngasunik sorpassuarnik suliassaqarpugut. Meeqqat atuarfianni pitsanngorsaasariaqarneq atuartitaanikkut angusat qaffassarnissaat piinnarnagit aammali atuarfiit iluarsaanneqartariaqartut imaluunniit nutaanik atuarfiliortariaqarneq annertuumik sammineqartariaqarpoq.

Aningaasarsiornikkut unittooraluttuinnarneq, aalisarnermi inatsisitigut nutarterisariaqarneq, aatsitassarsiornermi nunaqavissut sulisorineqarnissaat, inissaqartitsinikkut aalajangersimanerusunik siunnerfeqartariaqarneq, inuiaqatigiinni angerlarsimaffeqanngitsut allarpassuillu innuttaaqatigiulluta ulluinnarni inuunit-sinnut attuumassuteqartut nukinnik piffissamillu atuiiffigisussaagaluarpagut.

Unittooqqaneq avissaartuunnerlu ipianngunartut taarserlugit ataatsimoorluta siunissarput pillugu aallasanniarta.

Minnerunngitsumik ukiuni makkunani, nunatta Namminersorneq pillugu inatsit tunngavigalugu aatsitassatigut akisusaaffimmik tiguisimalernerata aammalu akisusaaffinnik allanik tiguisussaanerata nalaani, innuttaaqataasut oqartussaaqataanerannik aqutseriaaseq nukittoq ammasorlu, aalajangiisarnerni innuttaasunik paasitsitsiniaanernik akuutitsinermillu tunngaveqartinneqartoq, pingaruteqarluinnarpoq. Inuit Ataqtigiit qitiutippaat innuttaasut peqataatinneqarnerannik nukittorsaaneq.

Illoqarfiit nunaqarfiillu tamarmik akuutinneqassapput, ataatsimoorlulalu piffissamut ungasinnerusumut atasinnaasunik qanimut oqartussaaqataanerup atuuteqqiler-nissaata qulakkeerneqarnissaanut iluarsisutissanik nassaarniartariaqarpugut.

Taamaammat aamma nangittumik ilungersuutiguassavarput paasiuminartumik, ammasumik unneqqarissumillu naalackersuinikkut ingerlatseriaaseqarnissarput. Kiffartuussinermi peqquserluttarnernik akiuiniarneq inuillu pisinnaatitaaffii,

suliffeqarfiit isumaginninnikkut akisussaaqataanerat innuttaasunillu akuutitsisarneq siuarsarneqassapput.

Naalakkersuinikkut aqutsinermi naalakkersuilluarneq pissuserissaarnermik tunnga-veqarpoq innuttaasullu qinigaasunik asissuilinginnissaanik aamma imaqarluni, naalakkersuinikkullu suliaqarnermi malittarisassanut inatsisinullu atuuttunut ataqqinninnermik aallaaveqartariaqarluni.

Kingullermik Inatsisartunut qinersigattali ukioq ataaseq suli qaangiuteqqajangilaq. Maannamulli ajuusaarnaraluartumik Inuit Ataqatigiit, Nunatsinni innuttaaqaterpassuatta minnerunngitsumillu inuiannit nunatta avataaneersunit arajutsisimaneqarunaareerpoq qanoq Naalakkersuisooqatigiit arlaleriaqalutik naalakkersuinikkut aqutsinermi naalakkersuilluarneq aqutsisariaqarnerlu nalorsarfigitigineraat aammalu sinaakkutinut najoqqutassaritinneqartunut paasinnissimanagerat qanoq amigarlunnartigisoq.

Arlaleriaqaluta misillerfigisareeqaarput Naalakkersuisut Siulittaasuannit siuttuuffigineqartumik naalakkersuinikkut ingerlatsiniarnermi tukalluinnartumik Nunarput aqunniarneqartoq - Naalakkersuisunut ilaasortat ataasiakkaat eqqunngitsumik paasissutissisarnerat taakkunanngalu ataqqinangilluinnartumik pissusilersuutigineqartartut pissusissaannartut isigineqalerlutik ileqquliunneqalerluni.

Pissutsit taamaaliartornerat inuiaqatigiinnut kalaallinut iluaqutaanngilluinnarput, taamaalisoqarneralu akissaqartinngilarput!

Tamakkua saniatigut Inatsisartuni ilaasortat akornatsinni suleqatigiinnerput nukittorsartariaqarpoq. Ulluni kingullerni pisut kingunerisa ilagilerpaat partiit annerit marluk Inuit Ataqatigiit Siumullu kisingajammik ataatsimiititaliani ilaasortaataqalernerannik. Uagut isumaqarpugut qinikkat tamarmik Inatsisartut sulineranni peqataasariaqartut partiit qinigaatitaat qanorluunniit ikitsigigaluarpata, taamaattumik Inuit Ataqatigiinniit ataatsimiititaliani inissaqartitaanngitsut neqeroorfigaavut inissatta ilaannik ilaasortaaffeqaleqqullugit - aamma teknikikkut pituttuisumik isumaqatigiissuteqanngikkaluarluta. Assersuutigalugu attaviitsunngortoq Hans Enoksen aalisarnermut ataatsimiititaliami inissamik neqeroorfigerusupparput partiillu sinneruttut allanik neqeroorfigerusullugit.

Naalakkersuisunut tatiginninnginnermik taasinissamik siunnersuuteqarnissamut pissutissarpassuaqarpoq, apeqqutaavorli amerlanerussuteqartut pissutsinik atuuttunik allanngortitseqataarusunnersut imaluunniit massakktut ingerlaannarusunnersut. Taamaattumik oqaatigeqqissavara akisusaaffik tamakkiisoq Naalakkersuisut siulittaasuannut tuppoq, tamannalu naapertorlugu iliuuseqartariaqarluni. Inuianni toqqissisimannginnerujussuaq qaangerneqartariaqarpoq, unittoqqaneq qaangerneqartariaqarpoq - periarfissaavoq Naalakkersuisut siulittaasuata qinarseqqittoqarnissaanik nalunaaruteqarnissaa.

Naalakkersuisut siulittaasuut qanoq iliorniarpit?